

Antrittsrede vom 28.01.2025

Gschätzti Regierig, liebi Rotskolleginne und Kollege, wärti Medieverträterinne und -Verträter und Gäst im Livestream

Rot und Wiss si nit nume d Farbe vom Schwizer Wappe, sondern ou vo üsem Kanton. Worum grad rot-wiss?

Ziemlech sicher stöh die Farbe im Zämehang mitem im Mittualter erfundene Zeiche vor Thebäische Legion vor römische Armee im 3. Johrhundert. Der Ursus isch e Märtyrer i dere Legion gsi und aus Schutzpatron wird er mit roter Fahne und einem durchgehende weissen Chrüz dargstöt. Drunter gseht me d Standesfarbe Rot und Wiss.

Id Eidgenosseschaft ufgnoh worde isch Soledurn 1481 dank em Brueder Chlaus, em Niklaus von Flüe. Wo nämlech d Eidgenosseschaft i dere Zyt am zämebräche gsi isch, wüu d Gägesätz zwüsche de Städt- und Länderorte sech verscherft hei, hett me der iflussrich Obwaldner Brueder Klaus ir Tagsatzig vo Stans aus Rotgäber bizoge und är hett erreicht, dass Friburg aus 10. Und Soledurn aus 11. Kanton mit auerdings igschränkte Rächt id

Eidgenosseschaft ufgnoh worde si. Der Brueder Klaus isch ufgrund vo sire grosse Bedütig aus Statue uf der Balustrade vor St.Ursekathedrale (me gseht dort die 10 Heilige) und miteme Dänkmal uf der Chantierwise verewiget. Soledurn hett de spöter, 1499 im Schwabechrieg ir Schlacht bi Dornach wäsentlech zum Sieg vo de Eidgenosse bitreit.

Sowit öppis us der Gschicht, us der mehreri Johrhunderte zrugliegende Vergangeheit. I möchte chli öppis über Vergangeheit, Gägewart und Zuekunft aspräche. Wo stöh

mer hütt, wo wärde mir einigi Johr oder Johrzähnte spöter stoh?

D Historiker überliedere d Vergangeheit, mir aui erläbe grad i däm Momänt s «Hier und Jetzt». Über Zuekunft gitts Forschige, Prognose, Plän, Meinige.

Wie gseht das bi euch persönlech us i euem Läbe, gschätzti Dame und Herre? Der Mönsch cha ar Vergangeheit festhaute und fast nit drvo loscho. Är cha vonere bessere Zuekunft tröime und mit aune Mittu versueche, die z erreiche. Oder är cha s Hier und Jetzt gniesse aus gläbti Realität und drmit zfriede oder unzfriede si. Was isch die beschte Variante? E ideali Mischig? Der Buddha het mou gseit: «Verweile nicht in der Vergangenheit, träume nicht von der Zukunft. Konzentriere dich auf den gegenwärtigen Moment.» Was isch bi au dene Gedanke und Überlegige effektiv s Wichtigste im Läbe? Ir Politik mitbestimme? Sini liebste Hobbies aus Säubstverwirklichung uf der Maslow-Pyramide betribe? Finanziell guet absicheret si? Es cha Ereignis gä, wo sämtlechi Plän, Wünsch, Hoffnige und Ziel völlig übere Huufe gworfe wärde. Wo mir nach immer intensiver gwordene Brustschmärze der Kardiolog binere Häztkatheteruntersuechig Mitti Juli letscht Johr eröffnet hett, dass die wichtigsti Arterie so verängt isch, dass sehr rasch e Bypass-OP das Problem müessi löse, das isch ebe so ne Momänt gsi, wo sich d Prioritäte schlagartig verschobe hei und eim bewusst wird, dass nüt so wichtig isch wie d Gsundheit. So bini sehr dankbar, dass i hütt wieder gsund und fit do inne bi euch darf sitze.

Nach der persönliche Bär- und Talfahrt möchte zum Schluss zuggcho zu üs Politikerin und Politiker. Mir hei doch bezügloch Vergangeheit/Gägewart und Zuekunft e chli anderi, präziseri, gschärfti Roue inne: Mir erkenne im Hier und Jetzt was verautet isch, nümme funktioniert, e Uffrüschtig bruucht oder verbesseret würde cha und probiere mit üsere Arbeit im Sinn vor persönliche politischen Usrichtig d Zuekunft i die gewünschte Bahne z länke. Erfoug und Misserfoug ghöre zum Autag vor Politik. Mir isch es es Aliege, dass mir i üsere wichtige Ufgab aus Parlamänt bim debattiere enander zuelose und akzeptiere, dass es anderi Meinige gitt. Dass mir stets wärschetzend agiere und am politische Gägenüber mit Achtig und Respäkt begägne. So stöui mir e fruchtbare Parlamäntsbetrieb vor und so chaner ou effiziänt betriebe würde.

Auso denn: Packe mirs a! Beste Dank!